

金主幣救

國論

金主幣救國議

序

康子倦遊于歐美。息轍于檳榔嶼。隱几于南蘭堂。喟然索歎而歎曰。先生之歎歟。何深也。其居爲中國歟。外患迫歟。內訌深歟。中國其危歟。國債築若七里之城。監理說日聞。舉國徬徨。而先生不憂。今何憂之深也。康子蹙額支乎頤曰。嗚呼噫嘻。岌岌哉。不在其位。不謀其政。我未之能言也。雖然。外患迫矣。而未始至其時也。內訌深矣。而未始有其機也。國債夥矣。而未始立待償也。吾所深憂卻顧者。黎民阻飢。四海困窮。則天祿永終也。耗矣哀哉中國也。詩云。彼昏不知。一醉日富。其如我國民何哉。王覺任曰。先生嘗著理財救國論。與物質論並行。數年于茲矣。今者政府言籌備憲政。而區區地方自治。審判監獄。猶無力以舉之。而一艦之費以千萬計。一鎮之成以數

百萬計。更何力能整海陸軍。百政將安能措。勉強妄行。且將致亂。先生蘊積藏諸。其忍中國之危歟。坐視國民之溺歟。中朝雖棄先生。先生其能棄中國乎。先生其有以語我來。康子乃愀然曰。嘻。吾以中國故而喪吾家。幾戮吾身。吾安忍棄吾國民。雖然。病者呻吟愁苦。雖有國醫哀之憐之。然醫者雖有神方大藥。未有叩門而獻方者。果爾。則呵叱而擯逐之矣。夫理財學者。今萬國之新學。而非昔農國人所夢見也。昔丁酉時。孫壽州相國訪吾財政。吾謂中國歲入七千萬。以吾用歐美法爲之。十年可七十萬萬。相國亟請之。自午及酉。吾謂公無權。語之無益。壽州曰。何不獻之朝。吾曰。上無權而。后多欲。徒苦累吾民耳。言之無益。今亦猶是也。雖然。財政者。猶人身之血脉也。血枯則痿。脉絕則亡。今禍患迫臨于眉睫矣。血將枯。脉將絕。殆矣。夫英查理十一時。以財乏而克林威爾起。法路易十六時。以財政亂而大革命興。近元明之季世。亦以乏財加餉而亡。今政府者之所爲。猶瞽者執柁于巨風駭浪之

中。而又大霧晦冥。不知所屆。吾五萬萬人乘是舟者。危乎險哉。救國理財之方千萬。他不及圖。今萬國皆變金主幣。而吾國不改。則銀價日落。而吾民日困。租稅生計法無定。但此一事。國其破乎。積萬國之洪流。數十年之漲力。而發之于今。豈能久待。其在壬子後乎。吾理財救國論且有待焉。今先授幣制論一篇。以告國人。若能用其方而服之。國其有瘳。吾將有以告焉。王覺任曰。舉家大病將死。家有醫者。懷千金之良方。而不服焉。則無望也已矣。先生戊戌獻万醫國而見戮。今茲再服之而少瘳。若今不竟用其方也。猶無效也。請易其名曰金主幣救國議。以獻我執政及我國民。孔子二千四百六十年。光緒三十四年冬康有爲。

是書成于五年前。去冬。王覺任力請補綴序而付之滬上。猶議而未刻。至今則各省薦飢。有司遏糶。善富捐施以平糶。不知四海棣通。海水平流。外金既漲。內錢日落。則外商以其賤金而購吾貴米。故漲至倍蓰。吾民租入工

金不能加多。而米價乃驟倍蓰。他物稱是。日月加甚。民從何支。弱者惟有轉於溝壑。强者乘機揭竿而已。此豈待外患之瓜分。革命之內亂哉。蓋物價漲落無定。而租入工金額數有定。銀既落錢多日低。以有定日落之入。而供無定日漲之支。可一二倍。亦可三四倍。且可五倍十倍。夫一倍則窮者餓其半。中家困其半。二倍則窮者踣。中家落。三倍則大家困。中家盡。窮家不盡。斃則亂。需之兩年。民家蓄藏竭。舉國困斃。內亂徧起。迎闖王可免糧。而外難乘之。國命遂顛。自湖南飢亂。四川再告。各省日有聞。而舉國不知病之所由。乃爲渴糶平糶之舊方。平糶則無濟。渴糶則滋亂。皆由不知數十年來萬國皆變金主幣。而我不變。故受萬國銀落倒流之巨浸也。今再不改。吾爲茲懼。嗚呼不可以兩稔。幸吾言之不中也夫。自入秋來。滬津京廣銀行。聯翩同倒。日月益甚。必牽率而來。國家銀行。亦同破產。則內國將同歸于盡。或且牽動外人監理矣。若是則大變之來。不可卒歲。吾病久絕事。

今不可復忍。乃遂發此篇。一字一淚。讀者幸留意焉。人人共曉然。夫方今救國之危。切于病源。而共致力焉。勿曰政府。亦國民公共之責也。況今下有諮議局。上有資政院。外有數百萬之華僑。內有各省之銀行殷富。若知爲起死之第一方。而日夜合力大呼圖之。其猶有望也。庚戌秋更生再識。

金主幣救國議

篇目三十

幣制出于不能已之市易物交說第一

諸幣不如金良故生金先行說第二

用生金不如鑄錢而錢必用金銀銅說第三

錢法必圓而作肉好周郭刻記說第四

行錢法有母子相權考第五

金銀錢源流考第六

萬國金銀錢式出于佛羅練考第七

金銀兩幣爭行終行金主幣爲定考第八

四十年來萬國次第盡改金主幣考第九

用銀議頻起經九大會終歸永敗考第十

金銀比價古今沿變考第十一

歐洲金銀比價表第十二

金日漲銀日落萬國皆變金而中國不變國將枯死說第十三

今定金銀比價宜在二十換以上議第十四

錢制輕重考第十五

錢圓大小考第十六

錢圓宜小不宜大權量宜爽不能棄說第十七

鑄金銀銅幣重量十進劃一推行全國議第十八

萬國幣式美惡折衷說第十九

始鑄金錢應若干說第二十

鑄金錢後限制用銀鑄銀說第二十一

改行金主幣先備銀行說第二十二

先聚金以準備鑄金幣說第二十三

未鑄金錢先行法定金主幣說第二十四

銅錢改良及限用限鑄說第二十五

紙幣論篇目附

紙幣爲物理之極趨妙用說第二十六

行紙幣宜限額妄濫生害說第二十七

行紙幣宜付銀行而必備金說第二十八

不易法定鈔說第二十九

金主幣救國議

卷上

八

紙幣莫先于中國宋制已善惜不知設銀行說第三十

金主幣救國議卷一

南海康有爲更生箸

幣制出于不能已之市易物交說

凡天下之法。非出于故爲也。皆生于不能已。夫爲者敗之。此故爲而非不能已者也。不能已者。因時勢之自然。循人事之遷變。故曰時爲大。順次之。乘時體順而不行者。未之有也。不能已而已之。失時違順。未有不敗者也。

夫自人生而有身。有身則有飲食衣服器用室居之欲。以一人之身而不能備百業也。則各出其力。以分事漁牧耕織工商之業。夫人既分業矣。則所必需之服食室器。必不能以一人備作之。則必思通功易事。否則耕者餘粟。織者餘布。皆互有飢寒之憂。以人之智。必不若是其愚也。故交易之法出。以物易物。以所有易所無。以羨補不足。交易而退。各得其所。豈非人智之不能已者耶。

吾遊埃及。考屋壁繪圖。交易之盛。以物易物。已在七千年。而吾神農日中爲市。致天下之民。聚天下之貨。在希臘雅典歌林腓尼基迦太基三千年前矣。然

皆以物易物之時。未有易中之代品也。夫市易者。小之爲一人不能已之事。大之爲國家之事。然唐以絹易馬。宋明以茶易馬。國交之商務不盛。兩國之文野不等。亦終不能出以物易物之外。今非洲人與歐人市易亦以物交。蓋金幣爲易中之物。爲人所製。彼未識之。而物則文野所同認故也。然物太繁重。已非人情所便。況物多粗重。彼此相抵。必難適平。欲析則不能。失均則不可。于是必思得一代品以爲易中。于是有一易中之代物。能令彼此各得其均者。尤人情所共願也。于是貨幣起焉。蓋人愈多愈智。交易愈繁。則必創新法以利用前民。皆時勢不能已者也。

夫欲爲易中之代品。必適乎人俗之通用。時地之適宜。或爲人情所愛好者。乃能人人公許之。否則不能行也。

夫巢窟飲血食果之時。人如走鹿。未知交易。降是漁獵。交易卽起。各因其地其業之所有。以爲交易。漁者用龜貝。獵者用獸皮。後遂爲制。王莽之貨。尙有

龜貝。漢武之制。特作鹿皮。選羅近時。尙用貝貨。而吾徧遊埃及希臘印度及歐東南洋各博物院。莫不經用貝之一期。故吾貨文。皆從貝。有以哉。明世瓜哇蘇祿及南洋各國。以牛皮爲交易。今非洲猶多用獸皮易貨。亦其著矣。

及于耕織之世。以五穀布帛爲易中。詩云握粟出卜。則周以穀爲幣矣。至三國魏時。以穀帛兩幣孰勝。至開廷議。唐租庸調及兩稅亦稅米絹綿。以至宋明。至宣德之世。葉淇李敏以備邊故。乃始折銀。然民間田租。仍用米穀。傭工之償。亦兼穀食衣鞋抵易。至今歐美。亦猶行之。六朝唐宋。皆以絹爲幣。則禹貢以前其貨幣可推也。

物之美可爲飾。其人情所愛亦可爲幣。秦時禁以珠玉爲幣。然則秦前。常以珠玉爲幣矣。夫五金之精美。亦人情所愛而爲飾者也。

諸幣不如金良故生金制先行說

夫貨幣之用。既順時地而變物。卽因文野以進化。故用物之後。皮貝繼起。皮

貝之後。穀帛爲民所固有。尤爲宜民。然皮貝穀帛。皆爲易中之代品。亦未離于以物易物之意也。

夫以物易物之難行。而必改取于易中之代品也。非謂大小輕重長短。相距太遠。而分數爲難哉。非謂輕小微杪妙難析哉。非謂物價難定哉。非謂繁重難運哉。非謂市易大小難行哉。既以皮貝穀帛爲易中。而皮貝穀帛長短大小輕重難分。杪微輕小難析。繁重難運如故也。而皮穀易腐。布帛易爛。尤難久要也。且權輕重多少而易之。則美惡難齊。從美惡定之。則輕重大小迥反。吾至今不能解六朝唐宋之用絹穀爲易中何以行也。諸史多以數言之。其如腐惡之濫充何。不幾于教民作僞乎。

然則于通用愛玩之中。求其堅久不變。分析精微。運握輕小。最便于人用者。莫若五金矣。五洲萬國。渺不相通。不期而同。用金銀爲易中。非所謂不能已者耶。五金之始見用。只爲生金。埃及小亞細亞羅馬之先。皆用金銀塊交易。

今亞非各國尙多有者。雖吾國文明五千年。而元寶馬蹄諸錠。今尙通行。蓋自明宣德時葉淇李敏以折色用銀。代運輸邊。乃始以銀爲幣。然皆鑄爲元寶馬蹄錠餅金。實爲用生金之時代。迄今四百餘年。未有知鑄爲圓法。以利用前民者。惟吾粵自漢唐以來。久爲万市。諸國金銀錢。多有流入。而明正德後。墨西哥銀礦大開。地隸于班。澳門既開。歐交日盛。于是墨西哥圓銀。數百年溢入千粵土。其錢制純銀太軟。必和鉛銅。每十分不過九分純銀。若銷流百萬萬。則吾失利十萬萬元。以五百年通商計之。得我溢利不可計。今墨之度支部大臣。號稱最才。國既漸富。而其私家之富。尤甲于墨。聞其致富之由。不過歲運墨銀入中國之故。夫墨銀每圓。重略當吾七錢二分。每圓得吾溢利七分二厘。歲收吾溢利若干。可查歲銷入墨銀若干。吾昔考得其數。今失矣。若歲以三千萬來。則吾歲出暗款三百萬。吾國之民力幾何。而爲墨歲吸三百萬。若合計之。豈不大可駭哉。積五百年。當十五萬萬。倍于償日及八國之數矣。然舉國

上下五百年。英達接踵。懵然不知自鑄銀錢。豈不尤異耶。然用墨銀僅行于粵閩耳。他皆不行。蓋吾國自漢後。金銀幣中絕。實自明宣德至今。皆爲生金之世。耻哉耻哉。

用生金不如鑄錢而錢必用金銀銅說

夫易中旣知用五金矣。然只用生金之塊。則輕重旣待秤量。眞僞更需驗視。若商務繁。勢難速舉。于是精求利用。自不得不因此堅金。鑄爲錢式。著其重量。加以圖記。國家爲保証之。其利用前民。凡有六焉。

一市易只計數而不待秤量。

二眞僞不須考驗。

三國家爲証而民信用流通。

四輕小而便于轉運。

五可流通于外國。

今雖各國有禁或須補水而野蠻國常用他國之幣如英磅之大行于歐東及西東各國是也。墨銀行于我尤可耻。

六國家得權萬貨之情。以時歛放而爲之平準。

蓋自文化既盛。都邑繁而懋遷巨。則必鑄金爲錢。五洲萬國同之。豈非所謂民智之不能已者耶。

五金之名。曰金。曰銀。曰銅。曰鐵。曰鉛。曰錫。中國自古多有鐵錢。至近咸豐時。亦嘗鑄之。覽各國博物院。亦多鐵錢。野蠻國尤盛。然鐵易生銹。則質多變難耐久。故皆選金銀銅爲正幣。而以銀鉛錫助之。此物質之自然淘汰。而民智所同趨也。

錢法必圓而作肉好周郭刻記說

方錢古蓋多有。泉布刀之體。亦爲長方。漢武帝造錫白金重六兩者。其文馬方形。齊時亦作方錢。意大利之啡尼士及比利時丹墨古者。嘗亦作方錢。然握之有棱。于人不便。故太公作九府錢。錢式用圓。遂爲定制。五洲隔垠。大瀛亘古不通。而自埃及巴比倫希臘羅馬印度。乃至南洋蠻國。能鑄錢爲至通用者。

形式必圓。埃及六千年之錢式。已爲圓形。蓋錢者人所日用交通。掌常握持。必圓而後與掌無礙。此物理之必至。亦民智之不能已也。太公名以圖法。至矣哉。

圓錢必有肉好。周郭刻記。奸民盜鑄。必磨其郭取鋸。或薄其肉取贏。刻記模糊。以便磨刮而得利。故必肉好分明。不欲其薄。周廓稜稜。不欲其滑。圖記欲其繁多而明凸。乃一望而明辨。且易杜僞鑄也。五洲垠隔。大瀛亘古不通。而鑄錢之肉郭圖記。無不同也。此亦物理之自然。民智之不能已也。錢必寫其重量。或寫某地某人所鑄。或圖鑄者之面。如漢時文曰半兩。曰五銖。而埃及希臘羅馬歐印各國所鑄錢。皆寫其重量。圖其時王面。而佛羅鍊士始鑄金錢。卽寫其地以爲錢名。此中西皆同。蓋此亦物理之自然。民智之不能已也。

吾國錢圓面方。其孔曰好。蓋便于縐穿而提携之。古者定錢數。動曰百萬緡緡。無孔蓋不便矣。歐土之噠尼士丹墨。昔亦有有孔之錢。惟鑄金盛行。不須